

## Буряад драмын театр

Театр үлсэсэһөө эхилдэг гэжэ хүнүүд хэлэдэг. Харин манай буряад драмын театр үүдэнһээ эхилдэг. Театрай үүдэнүүд булта ондо ондоо, гоё угалзануудтай, зандан модондо адли үнгэтэй юм.

Театрай үһээнъ ямар гоё гээшэб! Люстрэнүүдынъ буряад малгайда адли. Люстрэ тойроод, буряад эхэнэрэй зүүдхэлнүүдтэ адли гоёолтонууд.

3-дахи дабхарта – харагшадай заал. Театрай тайзан бүхэндэ хүшэгэ байдаг. Харин манай буряад драмын театрта юрын хүшэгэ бэшэ, гобелен хүшэгэ юм. Тэрэ мориной һүүлээр нэхээтэй. Тэрэнэй «Хабар. Ургынууд» гэжэ эскизэй зохёогшод – уран зураашад Д.-Н. Дугаров, С. Ринчинов, Э. Аюшеев юм.

Театр 3 дабхартай. 1–дэхи дабхарта – хубсаһаа тайладаг газар, олон гэрэлнүүд, һуудалнууд. 2-дохи дабхарта – театрай үргэн уужам фойе. 2-дохи дабхарай бүхы баруун хана «Гэсэрэй нютагта» гэжэ панно эзэлдэг. Энэ бэлигтэй уран зурааша Алла Цибиковагай мэдээжэ панно гээшэ. Тэрээн дээрэ юун үгыб даа! Үльгэрэйшье, түүхыншье зурагууд, урданай мүнөө сагшье тэндэ зураатай. Зураг дээрэхи олон хүнүүд соо зураашанай нүхэд өөрыгөө танидаг юм. Зураашан өөрөөшье жаахан нохойтоёо тэндэ бии. Энэнь ехэ һонирхолтой!

3-дахи дабхарта - харагшадай заал.

Үшөө фойе соонъ театрай урданай, мүнөө үеын артистнарай дүрэ зурагууд үлгөөтэй. Буряад драмын түрүүшын бэлигтэй артистнар хэд байгааб гэхэдэ, Гомбожаб Цыденжапов, Мария Шамбуева, Найдан Гендунова, Чойжинима Генинов, Мария Степанова...

Хоца Намсараевай нэрэмжэтэ Бурядай гүрэнэй академическэ драмын театр буряад зонингоо соёл болбосоролой, ёһо заншалай түб болоно.

